

## Headlines

- 1 भारत दे मुख् न्यायधीश होरें आर्टिफिशल इंटैलीजेंस करी बनने आली चुनौतिएं बख्खी खबरदार करदे होई आक्खेआ ऐ जे एहदे कन्नै निबड़ने लेई सरबंघत लोकें गी विश्व स्तर पर रली मिलियै जतन करने दी लोड़ ऐ।
- 2 चुनां आयोग आस्सेआ बुर्जुग मतदाताएं गी घरै थमां वोट पाने दी सुविधा पैहली बारी दित्ते जाने करी, वोट पाने लेई उतसाह बधेआ ऐ।
- 3 रियासी जिले दे म्हौर इलाके च इक आतंकी ठकाने गी नास कीता गेआ ऐ। डोडा जिले च जित्थे अगले हफ्ते वोट पाने च सुरक्षा बवस्था मजबूत कीती गई ऐ।
- 4 बसाखी दा ध्यार पूरी जम्मू प्रांता उत्साह कन्नै मनाया जा'रदा ऐ। केई थाहरें बसोए दे मेले लग्गे दे न।

<><><><><><>

## Chief Justice AI

भारत दे मुख् न्यायधीश डी.वाई.चन्द्रचूड़ होरें अज्ज आक्खेआ जे आर्टिफिशल इंटैलीजेंस कन्नै जित्थे बड़े मते फायदे न, उत्थें गै एहदे करी केई चुनौतियां बी पैदा होआ'रदियां, जेड़ियां नैतिकता, जवाबदेही ते पक्षपात कन्नै जुड़ी दियां न। मुख् न्यायधीश होर भारत दी सुप्रीम कोर्ट ते सिंगापुर दी सुप्रीम कोर्ट बश्कार प्रौद्योगिकी ते वार्ता पर लागे दे सम्मेलन च बोला'रदे हे। उनें आक्खेआ जे आर्टिफिशल इंटैलीजेंस करी बनने आली चुनौतिएं कन्नै निबड़ने लेई दुनिया भरै दे सरबंघत लोकें दे तालमेल दी लोड़ ऐ। उनें अगें आक्खेआ जे आधुनिक गतिविधिएं च जिंदे च अदालतें दी कारवाई बी शामिल ऐ। आर्टिफिशल इंटैलीजेंस दे रलने करी नैतिकता, कनूनी ते होरने पैहलुएं कन्नै जुड़े दे जटिल मसलें बनी सकदे न, जिंदे पर विस्तार कन्नै बचार कीते जाने दी लोड़ ऐ।

<><><><><><>

## LG-Gen. Zorawar

उपराज्यपाल मनोज सिन्हा होरें महान योद्धा ते फौजी रणनीति दे महारथी जनरल जोरावर सिंह होरें गी उंदी जयंति पर श्रद्धांजलि अर्पित कीती। उपराज्यपाल होरें जेएंडके एक्स-सर्विसिस लीग पाससेआ आयोजित इक यादगारी समारोह च जनरल जोरावर सिंह हुंदी प्रतिभा पर पुष्पांजलि अर्पित कीती ते आक्खेआ जे जनरल जोरावर सिंह होर इक सच्चे राश्ट्री नायक हे जेहड़े मुख् भरै दे लोकें लेई प्रेरणा दा स्रोत न। उनें आक्खेआ जे दुनिया दे सब्बने शा महान फौजी कमांडरें चा इक, जनरल जोरावर सिंह हुंदी बेजोड़ दलेरी ते निष्ठा, देशवासिएं गी लगातार प्रेरित करदी रौहग। डीजीपी आर.आर.स्वैन, 26 इन्फैन्टरी डिवीजन दे जीओसी मेजर जनरल गौरव गौतम ते होरनें शख्सियतें बी जनरल जोरावर सिंह होरें गी श्रद्धांजलि अर्पित कीती।

<><><><><><>

## ECI-Samba(byte)

चुनां आयोग आस्सेआ बुर्जुग ते दिव्यांग लोकें आस्तै घरै थमां वोट पाने दी सुविधा दित्ते जाने करी मतदाताएं च ते खास करिये 85 ब'रें शा उप्पर उमरी दे बुर्जुगें च वोट पाने लेई बड़ा उत्साह बने दा ऐ। सांबा जिले दी खेरी मंडी दे 104 ब'रें दे राम लाल होर बड़े खुश न, की जे ओह पैहली बारी अपने घरै थमां वोट पांगन। उनें आकाशवाणी सांबा दे संवाददाता कन्नै गल्लबात बी कीती.....बाईट

उआं एह दस्सना जरूरी ऐ जे चुनां आयोग नै 85 ब'रे शा मती उमरी आले बुर्जुगें ते 40 फीसद शा मती विकलांगता आले मतदाताएं गी अपने घरें थमां वोट पाने दी सुविधा दित्ती ऐ।

<><><><><><>

## Security Doda (byte)

डोडा जिले च 19 अप्रैल गी मतदान आस्तै सुरक्षा बवस्था मजबूत कीती गई ऐ। मतदान गी 6 दिन गै रेही गेदे न, जिसी दिक्खदे होई सब्बने औने जाने आली थाहरें पर सुरक्षा जांच कीती जा'रदी ऐ। एह्दे अलावा नकदी ते नशे दी ढोहाई पर तक्क रखने आस्तै निगरानी टीमें गी बी खडेरेआ गेआ ऐ। प्रशासन आस्सेआ मतदान दा प्रतिशत कराने लेई केई जतन कीते जा'रदे न। आकाशवाणी डोडा दे संवाददाता कन्नै गल्ल करदे होई डिप्टी कमीशनर हरविंदर सिंह होरें मती जानकारी दित्ती

<><><><><><>

## DG Railways

बनिहाल रेलवे स्टेशन पर रेल सुरक्षा बल, रेल बोर्ड नमीं दिल्ली दे महानिदेशक ते उत्तरी रेल दे वरिष्ठ अधिकारिएं दौरा कीता ते सुरक्षा बवस्था दा जायजा लैता। उनें बनिहाल थमां संगलदान रेल पटरी दे हिस्से दा मुआयना कीता ते सुरक्षा प्रबंधें दा जायजा लैता।

<><><><><><>

## Centre Pulses

सरकारै आकखेआ ऐ जे दाली दे अग्रिम बपार च शामिल होने आलें खलाफ जरूरी चीजें सरबंधी कनून तैह्त सख्त कारवाई कीती जाग। उपभोक्ता मामले दिएं सचिव निधि खरे होरें 15 अप्रैल थमां दालें दे उद्योग सरबंधी प्रतिनिधिएं कन्ने गल्लबात आले कार्यक्रम दरान एह गल्लबात आले कार्यक्रम दरान एह गल्ल आक्खी ऐ। दालीं दे भंडारन दे विशें च उद्योग जगत थमां मिली दी जानकारी ते बजार प्रतिनिधिएं थमां हासल जानकारी दी तुलना कीती गई ऐ तां जे दाली दे भंडारन उप्पर ऑनलाइन तक्क रक्खी जाई सकै। निधि खरे होरें म्यामां थमां दालीं दे आयात दे सरबंधै च यांगून च स्थित भारती राजदूती दफतर कन्नै बी गल्लबात कीती ऐ।

<><><><><><>

## Hideout Reasi

जम्मू कश्मीर पुलसे औंदे लोकसभा चुनाएं शा पैहले आतंकवाद खलाफ इक बड़्डी कामयाबी हासल करदे होई रियासी जिले थमां थेआर ते गोला-बरूद बरामद कीते न। आकाशवाणी दे रियासी संवाददाता मूजब हासल होई दी खूफिया जानकारीएं दी बिनाह पर कारवाई करदे होई पुलसै महौर दे शाजरू इलाके च इक गुप्त ठकाने दा पता लाइयै उत्थुआं एह बरामदगी कीती ऐ। इंदे च रूट्टी दे डब्बे आली इक आईईडी, दऊं पस्तौलां, मैगजीनां, ए.के-47 दे राउंद, इलैक्ट्रिक डेटोनेटर ते होर बरूदी समेयान शामिल ऐ।

<><><><><><>

## PM-Tributes

प्रधानमंत्री नरेन्द्र मोदी होरें जल्लियां वाला बाग हत्तेआकांड च शहीद होए दे लोकें गी अज्ज श्रद्धाजलि अर्पित कीती। सन् 1919 च अज्जै दे ध्याड़े बरतानिया हकूमत दे जनरल डायर पास्सेआ जल्लियांवाला बाग च शांतिपूर्ण तरीके कन्नै प्रदर्शन करै करदे ज्हरां बद्धे लोकें पर गोलीबारी कीती गई ही।

<><><><><><>

## Baisakhi-Jammu(byte)

उत्तर भारत दे सब्बने शा लोकप्रिय ध्यारें चा इक बसाखी दा ध्यार जेहड़ा फसलें दी बाड़्डी दा बी प्रतीक ऐ, अज्ज जम्मू संभाग च बी बड़ी खुशी ते जोश कन्नै मनाया जा'रदा ऐ। आकाशवाणी दे जम्मू जिला संवाददाता अंकुश शर्मा दी रिपोर्ट मूजब जम्मू च बी एह ध्यार बड़े जोश ते जज्बे कन्नै मनाया जा'रदा ऐ ते जम्मू जिले दिएं केई थाहरें जिआं रणवीर नैहर पर बी बसाखी मेले दा आयोजन कीता गेआ। खरी मती गिनतरी च लोकें खास करिये नोजवानें इस मेले च हिस्सा लैता ते नैहरा कंउे स्थित मंदरै च मत्था बी टेकेआ। साढ़े संवाददाता नै इस मौके पर किश मकामी लोकें कन्नै गल्ल कीती.....बाईट

<><><><><><>

## Reasi Baisakhi(byte)

रियासी जिले दे डेरा ग्रां च स्थित डेरा बाबा बंदा बहादुर हुंदे ऐतिहासक गुरुद्वारे च अज्ज बसाखी दे मौके पर 15 जहार शा मते श्रद्धालुएं मत्था टेकेआ। आकाशवाणी संवाददाता दी रिपोर्ट मूजब 300 ब'रें पराना एह गुरुद्वारा ऐतिहासक ऐ ते एहदे च बाबा बंदा बहादुर हुंदी समाधि ऐ। डेरा बाबा दी गुरुद्वारा प्रबंधन कमेटी नै इस मौके पर श्रद्धालुएं आस्तै लोडचदे प्रबंध कीते। एहदे अलावा जिला प्रशासन नै बी मेले आली थाहर पीने दे पानी, फर्स्ट एड, बिजली सप्लाई, सुरक्षा, ट्रांसपोर्ट ते साफ सफाई दे सुद्धे प्रबंध जकीनी बनाए। इस मौके पर किश श्रद्धालुएं आकाशवाणी कन्नै गल्ल बी कीती.....बाईट

<><><><><><>

## Weather

जम्मू कश्मीर दे मते सारे हिस्सें च ओंदे मंगलवारें तोड़ी दरमेयाने दर्जे दी बरखा दी पेशगोई दी पच्छोकड़े च अज्ज जम्मू च बद्धोबद्ध तापमान 34.3 डिग्री सैलिसयस ते घट्टोघट्ट तापमान 20.5 डिग्री सैलिसयस रिकार्ड कीता गेआ। मोसम विभाग ने अगले 24एं घैंटे दरान प्रदेश च हौली ते गरज-चमक कन्ने बरखा बरने दे असार जताए न ते ओहदे बाद बी अगले दऊं दिन हौली थमां दरमेयाने दर्जे दी बरखा दी संभावना दस्सी ऐ। खराब मौसम ते बरखा करी किश थाहरें पर गडिडएं दी आओजाई बी किश चिरै लेई प्रभावत रेही सकदी ऐ।

<><><><><><>